



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

13.11.2020թ.

Ո Ր Ո Շ ՈՒ Մ
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁԻ

թիվ **ՍՅ-ԼՕ-2020/249**

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի
Քարտուղարությամբ՝ Լ. Անանիկյանի

Պատվիրատու՝ ՀՀ կրթության, գիտության, մշակույթի և սպորտի նախարարություն
Մասնակից՝ «Ալկոթերեյդինգ» ՍՊԸ

Գնման ընթացակարգի ծածկագիրը և առարկան՝

«ՀՀԿԳՄՍՆՀՄԱԱՊՁԲ-20/2» ծածկագրով մեկ անձ, հականեխիչ (անտիսեպտիկ)
հեղուկների ձեռքբերում

ՀՀ գնումների հետ կապված բողոքներ քննող անձը (այսուհետ՝ նաև Բողոքներ քննող
անձ)՝ ուսումնասիրելով Հայաստանի Հանրապետության ֆինանսների նախարարության
կողմից 22.10.2020թ.-ի թիվ 26/26-1/16005-2020 գրությամբ «Ալկոթերեյդինգ» ՍՊԸ-ին
(այսուհետ՝ նաև Մասնակից) գնումների գործընթացին մասնակցելու իրավունք չունեցող
մասնակիցների ցուցակում ներառելու նպատակով նախաձեռնված ընթացակարգով
ներկայացված հիմքերը,

Պ Ա Ր Զ Ե Ց

1. Գործի նախապատմությունը.

ՀՀ ֆինանսների նախարարությունը, ՀՀ կրթության, գիտության, մշակույթի և սպորտի նախարարության 16.10.2020թ. թիվ 08.1//27503-2020 գրության հիման վրա, 22.10.2020թ.-ին «Ալկոթերեյդինգ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքեր:

Բողոքներ քննող անձի գործը մակագրվել է 22.10.2020թ.-ին:

22.10.2020թ.-ին www.gnumner.am կայքում հրապարակված հայտարարությամբ գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը ընդունվել է վարույթ և տրվել է թիվ ՍՑ-ԼՕ-2020/249 համարի ծածկագիրը:

Բողոքներ քննող անձի որոշման հրապարակման օր է նշանակվել 13.11.2020թ.-ին:

2. ՀՀ կրթության, գիտության, մշակույթի և սպորտի նախարարության ներկայացրած փաստերը և դիրքորոշումը.

ՀՀ կրթության, գիտության, մշակույթի և սպորտի նախարարությունը 16.10.2020թ. թիվ 08.1//27503-2020 գրությամբ դիմել է ՀՀ ֆինանսների նախարարությանը՝ հայտնելով հետևյալը.

«Տեղեկացնում եմ Ձեզ, որ ՀՀ կառավարության 2020 թվական սեպտեմբերի 3-ի N 1524-Ն որոշմամբ պայմանավորված՝ նախարարության կողմից 2020 թվականի սեպտեմբերի 23-ին հրապարակության հիմքով պայմանավորված մեկ անձից գնման ընթացակարգով «ՀՀԿԳՄՍՆՀՄԱԱՊՁԲ-20/2» ծածկագրով կազմակերպված հականեխիչ (անտիսեպտիկ) հեղուկների գնման գործընթացին հայտ է ներկայացրել «Ալկոթերեյդինգ» ՍՊԸ-ն: Հաշվի առնելով, որ մասնակցի կողմից ներկայացված փաստաթղթերը կազմված չեն հրավերի պահանջներին համապատասխան՝ գնումների մասին ՀՀ օրենսդրությամբ սահմանված կարգով գնահատման գործընթացը կասեցվել է և 2020 թվականի սեպտեմբերի 24-ին առաջարկվել է «Ալկոթերեյդինգ» ՍՊԸ-ին մեկ աշխատանքային օրվա ընթացքում շրկել արձանագրված անհամապատասխանությունները, սակայն դրանք շրկվել են մասնակի և հիմք ընդունելով ՀՀ առողջապահության նախարարության կողմից ՀՀ կառավարության 04.05.2017թ. թիվ 526-Ն որոշմամբ հաստատված «Գնումների գործընթացի կազմակերպման» կարգի 67-րդ կետով նախատեսված եզրակացությունը՝ վերջինիս հայտը մերժվել է:

Ելնելով վերոգրյալից, գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով կից ներկայացնում եմ «Ալկոթերեյդինգ»

ՍՊԸ-ի վերաբերյալ տվյալները, վերջինիս հայտը, <https://armeps.am/> համակարգի միջոցով ուղարկված շտրկման մասին ծանուցումը, գնահատող հանձնաժողովի քարտուղարի էլեկտրոնային փոստից ուղարկված շտրկման մասին ծանուցումը, մասնակցի կողմից ներկայացված շտրկումը, ՀՀ առոջապահության նախարարությանն ուղղված և պատասխան գրությունները, գնահատող հանձնաժողովի նիստի արձանագրությունը և ձեռք բերվող գնման առարկաների մասով հաստատված գնումների պլանը, դրա տեղեկագրում (procurement.am) հրապարակված լինելը հավաստող՝ կայքից արտատպված փաստաթուղթը»:

Ելնելով վերոգրյալից և հիմք ընդունելով ՀՀ կառավարության 04.05.2017թ.-ի թիվ 526-Ն որոշմամբ հաստատված գնումների գործընթացի կազմակերպման կարգի 45-րդ կետի պահանջները, կից ներկայացվել է «ՀՀԿԳՄՍՆՀՄԱԱՊԶԲ-20/2» ծածկագրով հայտարարված գնման ընթացակարգի շրջանակներում «Ալկոթեյդինգ» ՍՊԸ-ի տվյալները՝ համապատասխան հիմքերով:

3. «Ալկոթեյդինգ» ՍՊԸ-ի ներկայացրած փաստարկները և դիրքորոշումը.

Բողոքներ քննող անձը 26.10.2020թ.-ին գրությամբ դիմել է «Ալկոթեյդինգ» ՍՊԸ-ին՝ հնարավորություն տալով ՀՀ ֆինանսների նախարարության կողմից 22.10.2020թ.-ի թիվ 26/26-1/16005-2020 գրությամբ նախաձեռնված ընթացակարգի վերաբերյալ ներկայացնել գրավոր կարծիք:

Մասնակիցը ստանալով կարծիք հայտնելու վերաբերյալ գրությունը, ինչպես նաև ծանուցված լինելով նիստերի տեղի, օրվա և ժամի մասին չի ներկայացրել գրավոր դիրքորոշում:

4. US-LO-2020/249 ընթացակարգի քննության համար էական նշանակություն ունեցող փաստերը.

Սույն գործի քննության համար էական նշանակություն ունեցող փաստերի համաձայն՝

i. ՀՀ կրթության, գիտության, մշակույթի և սպորտի նախարարության (այսուհետև նաև՝ Պատվիրատու) կողմից հականեխիչ (անտիսեսպտիկ) հեղուկների ձեռքբերման նպատակով 17.09.2020թ.-ին հայտարարվել է «ՀՀԿԳՄՍՆՀՄԱԱՊԶԲ-20/2» ծածկագրով մեկ անձ (այսուհետև նաև՝ Ընթացակարգ):

ii. Ընթացակարգին մասնակցելու նպատակով հայտ է ներկայացրել նաև «Ալկոթեյդինգ» ՍՊԸ-ն:

iii. «Ալկոթրեյդինգ» ՍՊԸ-ն մասնակցության հայտի թիվ 1 հավելվածով՝ մեկ անձից գնմանը մասնակցելու դիմում-հայտարարությամբ, հայտարարել և հավաստել է, որ բավարարում է «ՀՀԿԳՄՍՆՀՄԱԱՊԶԲ-20/2» ծածկագրով գնման ընթացակարգի հրավերով սահմանված մասնակցության իրավունքի պահանջներին և հրավերի պահանջներին համապատասխան ներկայացնում է հայտ:

iv. Ընթացակարգի գնահատող հանձնաժողովի (այսուհետ նաև՝ Հանձնաժողով) 23.09.2020թ.-ին կայացված նիստի թիվ 2 արձանագրության համաձայն՝ «Ալկոթրեյդինգ» ՍՊԸ-ի կողմից հայտով ներկայացված փաստաթղթերը չեն համապատասխանում հրավերով սահմանված պահանջներին, մասնավորապես՝ Հավելված 1.1-ում՝ առաջարկվող ապրանքի ամբողջական նկարագրում առաջարկվող ապրանքի տեխնիկական բնութագիրը թերի է՝ բացակայում են առաջարկվող ապրանքի ՀՀ Առողջապահության նախարարության մեթոդական հրահանգներով հաստատված լինելու և հանձնելու պահին պիտանելիության ժամկետի վերաբերյալ նշումները, անհրաժեշտ է ներկայացնել ՀՀ Առողջապահության նախարարության կողմից հաստատված օգտագործման մեթոդական համապատասխան հրահանգը:

v. Նույն արձանագրության 8.1 կետի համաձայն՝ Հանձնաժողովը, հիմք ընդունելով Կարգի 41-րդ կետի պահանջները, որոշել է կասեցնել նիստը և ծանուցել Մասնակցին մեկ աշխատանքային օրվա ընթացքում շտկել արձանագրված անհամապատասխանությունները:

vi. Ընթացակարգի գնահատող հանձնաժողովի քարտուղար՝ Ա. Սողոմոնյանը armeps.am համակարգի ոչ ավտոմատ ծանուցման միջոցով 24.09.2020թ.-ին Մասնակցի alcotrading2020@gmail.com էլ. հասցեին է ուղարկել արձանագրված անհամապատասխանությունների վերաբերյալ շտկման մասին ծանուցում:

vii. Հանձնաժողովի 28.09.2020թ.-ին կայացված նիստի թիվ 2 արձանագրության 9.2 կետի համաձայն՝ «Ալկոթրեյդինգ» ՍՊԸ-ն սահմանված ժամկետում ամբողջությամբ չի շտկել գնահատող հանձնաժողովի կողմից արձանագրված անհամապատասխանությունները, մասնավորապես մասնակցի հայտով ներկայացված ապրանքի տեխնիկական բնութագրում թեև առկա է առաջարկվող ապրանքի ՀՀ Առողջապահության նախարարության մեթոդական հրահանգներով հաստատված լինելու վերաբերյալ նշումը, սակայն այն չի ներկայացվել, ներկայացվել է Եվրասիական տնտեսական միության համապատասխանության հայտարարագիր, ինչը չի հաստատում վերոնշյալ հրահանգի առկայությունը:

viii. Նույն արձանագրության 10.1 կետի համաձայն՝ Հանձնաժողովը, հիմք ընդունելով Կարգի 67-րդ կետը, որոշել է կասեցնել գնահատման գործընթացը և դիմել ՀՀ առողջապահության նախարարություն՝ Մասնակցի կողմից առաջարկվող ապրանքի հրավերով

պահանջվող տեխնիկական բնութագրի պահանջներին համապատասխանության մասին եզրակացություն տրամադրելու համար:

ix. Հանձնաժողովի 08.10.2020թ.-ին կայացված նիստի թիվ 2 արձանագրության 11.1 կետի համաձայն՝ Հանձնաժողովը, հիմք ընդունելով ՀՀ առողջապահության նախարարությունից 06.10.2020թ.-ին ստացված թիվ Մ-88005-2020 գրությունը, արձանագրել է, որ «Ալկոթերյդինգ» ՍՊԸ-ի կողմից ներկայացված փաստաթղթերը չեն համապատասխանում հրավերով սահմանված պահանջներին:

x. ՀՀ առողջապահության նախարարության 06.10.2020թ.-ին տրված թիվ Մ-88005-2020 գրության համաձայն՝ ի պատասխան 2020 թվականի սեպտեմբերի 29-ի ՀՀ կրթության, գիտության, մշակույթի և սպորտի նախարարության թիվ 04//25998-2020 գրության, կից ներկայացվել է Առողջապահության նախարարության «Հիվանդությունների վերահսկման և կանխարգելման ազգային կենտրոն» ՊՈԱԿ-ի կողմից՝ «ՀՀԿԳՄՍՆՀՄԱԱՊԶԲ-20/2» ծածկագրով հրատապության հիմքով պայմանավորված մեկ անձից գնման ընթացակարգի մասնակիցների կողմից առաջարկվող ապրանքների հրավերով պահանջվող տեխնիկական բնութագրի պահանջներին համապատասխանության վերաբերյալ մասնագիտական կարծիքը, համաձայն որի՝ ի պատասխան ԼՔ/06.3/23007-2020 գրության, «ՀՀԿԳՄՍՆՀՄԱԱՊԶԲ-20/2» ծածկագրով գնման ընթացակարգի տեխնիկական բնութագրերի համապատասխանության վերաբերյալ, հայտվել է, որ հրավերով ներկայացված միջոցի տեխնիկական բնութագրին համապատասխանության վերաբերյալ մասնագիտական կարծիք հնարավոր չէ ներկայացնել, քանի որ կից ներկայացված չէ ԱՆ հրամանով հաստատված մեթոդական ուղեցույցը, որտեղ հստակ նշվում են միջոցի ազդող նյութը, պիտանելիության ժամկետը, կիրառման ոլորտը, նյութի թունաբանական դասը: Միաժամանակ հայտվել է, որ ներկայացված նյութին կից համապատասխանության հավաստագրով վերջինս ըստ ԱՏԳ դասակարգչի դասվում է 3404 կոդին՝ այն է՝ Կոսմետիկական կամ դիմահարդարման և մաշկի խնամքի միջոցներ (բացի դեղամիջոցներից)՝ ներառյալ միջոցները՝ արևաթխության դեմ կամ արևաթխության համար, մանիկյուրի և պեդիկյուրի միջոցներ:

5. Բողոքներ քննող անձի հիմնավորումները և եզրահանգումը.

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակացության, որ ՀՀ ֆինանսների նախարարության կողմից 22.10.2020թ.-ի թիվ 26/26-1/16005-2020 գրությամբ «Ալկոթերյդինգ»

ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգն ենթակա է բավարարման, հետևյալ պատճառաբանությամբ.

«Գնումների մասին» ՀՀ օրենքի (այսուհետ նաև՝ Օրենք) 30-րդ հոդվածի 1-ին մասի համաձայն՝ մասնակիցը հայտը ներկայացնում է հրավերով սահմանված կարգով: Հայտը ներառում է մասնակցի հաստատած՝

1) հրավերի պահանջներին իր տվյալների համապատասխանության մասին հայտարարությունը.

2) գնային առաջարկը.

3) ոչ գնային առաջարկը (տեխնիկական առաջարկ կամ տեխնիկական բնութագիր), եթե հրավերով նախատեսված է.

4) հրավերով նախատեսված այլ փաստաթղթեր (տեղեկություններ):

ՀՀ կառավարության 04.05.2017թ.-ի թիվ 526-Ն որոշմամբ (21.05.2020թ.-ի թիվ 778-Ն փոփոխություններով) հաստատված «Գնումների գործընթացի կազմակերպման» կարգի (այսուհետ նաև՝ Կարգ) 32-րդ կետի 1-ին ենթակետի «գ» պարբերության համաձայն՝ հրավերով նախատեսվում է նաև, որ մասնակիցը հայտով ներկայացնում է ապրանքների գնման դեպքում իր կողմից առաջարկվող ապրանքի տեխնիկական բնութագրերը, իսկ հրավերով նախատեսված դեպքերում նաև առաջարկվող ապրանքի ապրանքային նշանը, ֆիրմային անվանումը, մակնիշը և արտադրողի անվանումը (այսուհետ՝ ապրանքի ամբողջական նկարագիր):

Կարգի 40-րդ կետի 4-րդ ենթակետի համաձայն՝ հայտերի բացման և գնահատման նիստում հանձնաժողովը մերժում է այն հայտերը, որոնցում բացակայում է գնային առաջարկը, կամ եթե այն ներկայացված է հրավերի պահանջներին անհամապատասխան, բացառությամբ սույն կարգի 41-րդ կետով նախատեսված դեպքի:

Կարգի 41-րդ կետի համաձայն՝ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ ներառյալ այն դեպքերը, երբ հայտում ներառված՝ Հայաստանի Հանրապետության ռեզիդենտ հանդիսացող մասնակցի կողմից հաստատված փաստաթղթերը կամ դրանց մի մասը հաստատված չեն էլեկտրոնային թվային ստորագրությամբ, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

Նույն Կարգի 42-րդ կետի համաձայն՝ Եթե սույն կարգի 41-րդ կետով սահմանված ժամկետում մասնակիցը շտկում է արձանագրված անհամապատասխանությունը, ապա նրա հայտը գնահատվում է բավարար: Հակառակ դեպքում տվյալ մասնակցի հայտը գնահատվում է անբավարար և մերժվում է, ներառյալ եթե մասնակիցը սույն կարգի 32-րդ կետի 1-ին մասի «ե» պարբերությամբ սահմանված ժամկետում չի ներկայացնում հայտի ապահովման բնօրինակը, իսկ ընտրված մասնակից է ճանաչվում հաջորդող տեղ զբաղեցրած մասնակիցը:

ՀՀ կրթության, գիտության, մշակույթի և սպորտի նախարարության կողմից հականեխիջ (անտիսեպտիկ) հեղուկների ձեռքբերման նպատակով 17.09.2020թ.-ին հայտարարված «ՀՀԿԳՄՍՆՀՄԱԱՊՁԲ-20/2» ծածկագրով գնման ընթացակարգի հրավերի (այսուհետ նաև՝ Հրավեր) 8.9-րդ կետի համաձայն՝ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ, ներառյալ երբ հայտում ներառված՝ Հայաստանի Հանրապետության ռեզիդենտ հանդիսացող մասնակցի կողմից հաստատված փաստաթղթերը կամ դրանց մի մասը հաստատված չեն էլեկտրոնային թվային ստորագրությամբ, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին համակարգի միջոցով տեղեկացնում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

Հրավերի 8.10-րդ կետի համաձայն՝ եթե սույն հրավերի 8.9-րդ կետով սահմանված ժամկետում մասնակիցը շտկում է արձանագրված անհամապատասխանությունը, ապա վերջինիս հայտը գնահատվում է բավարար: Հակառակ դեպքում տվյալ մասնակցի հայտը գնահատվում է անբավարար և մերժվում է, իսկ ընտրված մասնակից է ճանաչվում հաջորդող տեղ զբաղեցրած մասնակիցը:

Վերոգրյալ իրավակարգավորումների լույսի ներքո, Բողոքներ քննող անձը փաստում է, որ մասնակիցը ներկայացնում է հրավերով սահմանված կարգով հայտ, որը ներառում է մասնակցի կողմից ներկայացված դիմում-հայտարարությունը, առաջարկվող ապրանքի ամբողջական նկարագիրը, գնային առաջարկը, հրավերով նախատեսված այլ փաստաթղթեր (տեղեկություններ): Ընդ որում, Կարգի 41-րդ կետը ուղղակիորեն սահմանում է արձանագրված անհամապատասխանությունը շտկելու անթույլատրելիություն հայտում ներառվող միայն գնային առաջարկի համար, այն էլ՝ որոշ բացառություններով: Սույն կետի իմաստից բխում է, որ մնացած բոլոր դեպքերում հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով

տեղեկացնում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

Հայտերի գնահատումն իրականացվում է հրավերով սահմանված կարգով և հրավերով նախատեսված պայմաններին չհամապատասխանող հայտերը գնահատվում են անբավարար և մերժվում են, ներառյալ եթե մասնակիցը մինչև հայտերի ներկայացման վերջնաժամկետը լրանալուն հաջորդող աշխատանքային օրվա Երևանի ժամանակով 17:00-ն գնահատող հանձնաժողովին չի ներկայացնում հայտի ապահովման բնօրինակը:

Բողոքներ քննող անձը հարկ է համարում նշել, որ օրենսդիրն իմպերատիվ կերպով սահմանել է, որ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ, բացառությամբ այն դեպքերի երբ բացակայում է գնային առաջարկը կամ եթե վերջինս ներկայացված է հրավերի պահանջներին անհամապատասխան, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

Սույն գործի փաստերի համաձայն՝ ՀՀ կրթության, գիտության, մշակույթի և սպորտի նախարարության կողմից հակաանեխիզ (անտիսեպտիկ) հեղուկների ձեռքբերման նպատակով 17.09.2020թ.-ին հայտարարված «ՀՀԿԳՄՍՆՀՄԱԱՊՁԲ-20/2» ծածկագրով գնման ընթացակարգին մասնակցելու նպատակով հայտ ներկայացրած «Ալկոթերյդինգ» ՍՊԸ-ի կողմից հայտով ներկայացված փաստաթղթերը չեն համապատասխանել հրավերով սահմանված պահանջներին, մասնավորապես՝ Հավելված 1.1-ում՝ առաջարկվող ապրանքի ամբողջական նկարագրում առաջարկվող ապրանքի տեխնիկական բնութագիրը թերի է՝ բացակայում են առաջարկվող ապրանքի ՀՀ Առողջապահության նախարարության մեթոդական հրահանգներով հաստատված լինելու և հանձնելու պահին պիտանելիության ժամկետի վերաբերյալ նշումները, անհրաժեշտ է ներկայացնել ՀՀ Առողջապահության նախարարության կողմից հաստատված օգտագործման մեթոդական համապատասխան հրահանգը: Նույն արձանագրությամբ Հանձնաժողովը, հիմք ընդունելով Կարգի 41-րդ կետի պահանջները, որոշել է կասեցնել նիստը և ծանուցել Մասնակցին մեկ աշխատանքային օրվա ընթացքում շտկել արձանագրված անհամապատասխանությունները:

Հանձնաժողովի 08.10.2020թ.-ին կայացված նիստի թիվ 2 արձանագրությամբ, Հանձնաժողովը, հիմք ընդունելով ՀՀ առողջապահության նախարարությունից 06.10.2020թ. ստացված թիվ Մ-88005-2020 գրությունը, արձանագրել է, որ «Ալկոթերյդինգ» ՍՊԸ-ի կողմից

ներկայացված փաստաթղթերը չեն համապատասխանում հրավերով սահմանված պահանջներին:

ՀՀ առողջապահության նախարարության 06.10.2020թ.-ին տրված թիվ Մ-88005-2020 գրության համաձայն՝ ի պատասխան 2020 թվականի սեպտեմբերի 29-ի ՀՀ կրթության, գիտության, մշակույթի և սպորտի նախարարության թիվ 04//25998-2020 գրության, կից ներկայացվել է Առողջապահության նախարարության «Հիվանդությունների վերահսկման և կանխարգելման ազգային կենտրոն» ՊՈԱԿ-ի կողմից՝ «ՀՀԿԳՄՍՆՀՄԱԱՊԶԲ-20/2» ծածկագրով հրատապության հիմքով պայմանավորված մեկ անձից գնման ընթացակարգի մասնակիցների կողմից առաջարկվող ապրանքների հրավերով պահանջվող տեխնիկական բնութագրի պահանջներին համապատասխանության վերաբերյալ մասնագիտական կարծիքը, համաձայն որի՝ ի պատասխան ԼԲ/06.3/23007-2020 գրության, «ՀՀԿԳՄՍՆՀՄԱԱՊԶԲ-20/2» ծածկագրով գնման ընթացակարգի տեխնիկական բնութագրերի համապատասխանության վերաբերյալ, հայտվել է, որ հրավերով ներկայացված միջոցի տեխնիկական բնութագրին համապատասխանության վերաբերյալ մասնագիտական կարծիք հնարավոր չէ ներկայացնել, քանի որ կից ներկայացված չէ ԱՆ հրամանով հաստատված մեթոդական ուղեցույցը, որտեղ հստակ նշվում են միջոցի ազդող նյութը, պիտանելիության ժամկետը, կիրառման ոլորտը, նյութի թունաբանական դասը: Միաժամանակ հայտվել է, որ ներկայացված նյութին կից համապատասխանության հավաստագրով վերջինս ըստ ԱՏԳ դասակարգչի դասվում է 3404 կոդին՝ այն է՝ Կոսմետիկական կամ դիմահարդարման և մաշկի խնամքի միջոցներ (բացի դեղամիջոցներից)՝ ներառյալ միջոցները՝ արևաթխության դեմ կամ արևաթխության համար, մանիկյուրի և պեդիկյուրի միջոցներ:

Վերոնշյալ իրավական նորմերի և փաստական հանգամանքների հիման, դրանք համադրելով Մասնակցի ներկայացրած դիրքորոշման հանգամանքներին՝ Բողոքներ քննող անձն արձանագրում է, որ Կարգի 41-րդ կետն ուղղակիորեն սահմանում է և այդ կետի իմաստից բխում է, որ հայտում ներառվող փաստաթղթերում արձանագրված՝ շտկման ենթակա անհամապատասխանություններն ենթակա են շտկման՝ հանձնաժողովի քարտուղարի կողմից Մասնակցին էլեկտրոնային եղանակով ուղարկված ծանուցման ստացման պահից հաշված մեկ աշխատանքային օրյա ժամկետում:

Բողոքներ քննող անձը հարկ է համարում հավելվել նաև, որ ստանձնած պարտավորությունների (այդ թվում՝ ընթացակարգի և պայմանագրի) խախտման հիմքերը պայմանականորեն կարելի է բաժանել երկու խմբի՝ օբյեկտիվ և սուբյեկտիվ: Օբյեկտիվ հիմքերի մեջ կարելի է դասել ֆորսմաժորային դեպքերը՝ տարերային աղետները, ինչպես նաև արտակարգ իրավիճակը և նմանատիպ այլ՝ անձանց կամքից անկախ հիմքերով առաջացող

պատճառները: Սուբյեկտիվ գործոնը պայմանավորված է անմիջականորեն տվյալ անձի հետ կապված և գործնականում ավելի երկար ժամանակ պահանջող ողջամիտ խնդիրների լուծմամբ, առանց որի անհնար է ստանձնած պարտավորությունների կատարումը:

Բողոքներ քննող անձն արձանագրում է, որ բոլոր դեպքերում էլ, բացի ֆորսմաժորային իրավիճակներից, ստանձնած պարտավորությունների խախտման համար մեղքի բացակայության փաստը հաստատված համարելու համար ընդհանուր կանոնն այն է, որ անձը պարտավոր է ապացուցել, որ օրենքով սահմանված պարտավորությունների կատարման համար անհրաժեշտ ժամկետի ընթացքում ձեռնարկել է իրենից կախված ողջամիտ ու բավարար միջոցներ այդ պարտավորությունների պատշաճ կատարումն իրականացնելու ուղղությամբ, սակայն իր կամքից անկախ պատճառներով խախտել է գնման ընթացակարգով կամ պայմանագրով ստանձնած պարտավորությունը(ները): Օբյեկտիվ և սուբյեկտիվ հիմքերի վերաբերյալ նմանատիպ դիրքորոշում է հայտնել ՀՀ վճռաբեկ դատարանն իր նախկինում կայացրած որոշումներում (*տե՛ս, «Հայբիզնեսբանկ» ՓԲԸ-ն ընդդեմ «Միլլար» ՍՊԸ-ի թիվ ԵԿԴ/2628/02/13 քաղաքացիական գործով ՀՀ վճռաբեկ դատարանի 03.12.2014 թվականի որոշումը*):

Օրենսդիրը, արձանագրված անհամապատասխանությունների շտկում ներկայացնելու պարտականության կատարման համար սահմանելով այդպիսի պահանջ ստանալու պահից հաշված 1 աշխատանքային օրյա ժամկետ, գնման գործընթացի մասնակիցներին ընձեռել է այն օբյեկտիվ ժամանակահատվածը, երբ վերջիններս կարող են իրացնել Օրենքով և Կարգով սահմանված՝ արձանագրված անհամապատասխանությունների շտկելու պարտավորությունը: Ուստի սահմանված պատասխանատվության միջոցները կարող են ի հայտ գալ միայն սահմանված ժամկետի ավարտմամբ կամ մասնակցի կողմից այնպիսի գործողություններ կատարելու արդյունքում, որոնք վկայում են վերջինիս կողմից արձանագրված անհամապատասխանությունները շտկելուց հրաժարվելու մասին:

Օրենքի 6-րդ հոդվածի 1-ին մասի 6-րդ ենթակետի համաձայն՝ գնումների ընթացակարգերին մասնակցելու իրավունք չունեն այն անձինք՝ որոնք հայտը ներկայացնելու օրվա գրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Նույն հոդվածի 2-րդ մասի համաձայն՝ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում: Տվյալ մասնակցի կարծիքը լսելուց հետո գնումների հետ կապված բողոքներ քննող անձը նույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին նույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Կարգի 32-րդ կետի 19-րդ ենթակետի համաձայն՝ հրավերով նախատեսվում է նաև, որ եթե մասնակցի՝ հրավերով նախատեսված գնումներին մասնակցելու իրավունք ունենալու մասին հավաստումը որակվում է որպես իրականությանը չհամապատասխանող, կամ մասնակիցը հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը կամ ընտրված մասնակիցը չի ներկայացնում որակավորման ապահովումը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում:

Կարգի 45-րդ կետի համաձայն՝ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում նախաձեռնում է տվյալ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

Նշված իրավանորմերի վերլուծությունից պետք է փաստել, որ Օրենսդիրը մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու համար նախատեսել է սպառիչ պայմաններ, որոնք են պայմանագրով նախատեսված կամ գնման գործընթացի շրջանակում ստանձնած պարտավորությունների խախտումը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, որպես ընտրված մասնակից պայմանագիր կնքելուց հրաժարվելը և հայտերը բացելուց հետո գնման գործընթացին հետագա մասնակցությունից հրաժարվելը: Միայն սույն դեպքերում է հնարավոր մասնակցին ներառել գնումների գործընթացին մասնակցելու իրավունք չունեցող մասնակիցների ցուցակում:

Բողոքներ քննող անձը փաստում է նաև, որ մասնակիցը պարտավոր է ներկայացնել հրավերով սահմանված պահանջներին համապատասխանող փաստաթղթեր (այսուհետ՝ Փաստաթղթեր): Եվ եթե Փաստաթղթերում արձանագրվում են անհամապատասխանություններ՝ հրավերի պահանջների նկատմամբ, իսկ մասնակիցը սահմանված ժամկետում չի շտկում արձանագրված անհամապատասխանությունները, ապա այդ հանգամանքը համարվում է որպես գնման գործընթացի շրջանակում ստանձնած պարտավորության խախտում:

Սույն գործի փաստերի համաձայն՝ «Ալկոթերթյինգ» ՍՊԸ-ն թիվ 1 հավելվածով՝ մեկ անձից գնմանը մասնակցելու դիմում-հայտարարությամբ, հայտարարել և հավաստել է, որ բավարարում է «ՀՀԿԳՄՍՆՀՄԱԱՊԶԲ-20/2» ծածկագրով գնման ընթացակարգի հրավերով սահմանված մասնակցության իրավունքի պահանջներին և հրավերի պահանջներին համապատասխան ներկայացնում է հայտ:

Վերոնշյալներով պայմանավորված՝ առաջանում է «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետի դրույթների կիրառման անխուսափելիությունը, քանի որ Մասնակիցն իր գործողություններով կամ անգործությամբ, խախտելով գնման գործընթացի շրջանակում ստանձնած պարտավորությունը, հանգեցրել է Պատվիրատուի կողմից գնման գործընթացին տվյալ մասնակցի հետագա մասնակցության դադարեցմանը, որպիսի պայմաններում Մասնակիցը պետք է ընդգրկվի գնումների գործընթացին մասնակցելու իրավունք չունեցող մասնակիցների ցուցակում՝ 2 (երկու) տարի ժամկետով:

Այսպիսով, վերոհիշյալ փաստական հանգամանքների և իրավական նորմերի լույսի ներքո, դրանց համակարգված վերլուծության արդյունքում Բողոքներ քննող անձը հանգում է այն եզրակացության, որ «Ալկոթերթյինգ» ՍՊԸ-ն Պատվիրատուի կողմից սահմանված ժամանակահատվածում, չշտկելով արձանագրված անհամապատասխանությունները, խախտել է գնման գործընթացի շրջանակում ստանձնած պարտավորությունը, որն էլ հանգեցրել է գնման գործընթացին տվյալ մասնակցի հետագա մասնակցության դադարեցմանը:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների հետ կապված բողոքներ քննող անձը՝

Ո Ր Ո Շ Ե Ց

1. ՀՀ Ֆինանսների նախարարության կողմից 22.10.2020թ.-ի թիվ 26/26-1/16005-2020 գրությամբ «Ալկոթերթյինգ» ՍՊԸ-ին գնումների գործընթացին մասնակցելու իրավունք

չունեցող մասնակիցների ցուցակում ներառելու նպատակով նախաձեռնված ԱՅ-ԼՕ-2020/249 ծածկագրով ընթացակարգը բավարարել:

2. «Ալկոթերեյդինգ» ՍՊԸ-ին ընդգրկել գնումների գործընթացին մասնակցելու իրավունք չունեցող մասնակիցների ցուցակում 2 (երկու) տարի ժամկետով:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**ՀՀ ԳՆՈՒՄՆԵՐԻ ՀԵՏ ԿԱՊՎԱԾ
ԲՈՂՈՔՆԵՐ ՔՆՆՈՂ ԱՆՁ՝**



ԼԵՎՈՆ ՕՎԱՆՅԱՆ